


國朝耆獻類徵初編



明倫彙編
家範典
卷一百一十五



國朝耆獻類徵初編卷首之八十九

通奉大夫前署江西巡撫江西布政使司布政使臣李桓恭錄

欽定外藩蒙古回部王公表傳卷之七十七

傳第六十一

厄魯特扎薩克多羅郡王阿喇布坦列傳

今襲固山貝子

阿喇布坦厄魯特人準噶爾族姓綽羅斯準噶爾稱北厄魯特系出額斯墨特達爾漢諾顏越六傳有呼達該圖哈喇呼勒者號多克辛諾顏子三長巴圖爾琿台吉裔詳青海厄魯特部傳次墨爾根岱青爲阿喇布坦祖次楚琥爾烏巴什有孫曰罕篤旣降復叛事見阿拉善厄魯特部傳墨爾根岱青子二長丹津號噶爾瑪岱

青和碩齊次阿海三傳至達什達瓦嗣絕丹津子二長衮布巴圖爾系不著次都噶爾子五長車零次達都琥次罕都次卽阿喇布坦次達瑪璘阿喇布坦以所部台吉多同名故從其祖父稱別之曰丹津阿喇布坦又曰都噶爾阿喇布坦初巴圖爾琿台吉游牧阿爾台子噶勒丹嗣爲厄魯特長諸台吉皆附之貢不得自奉表惟丹津得專使閒歲輒遣至康熙二十二年定厄魯特貢例使入關以二百人爲額

諭噶勒丹及丹津知之丹津卒都噶爾嗣乞入市

京師

諭自四厄魯特大台吉外皆市張家口永爲令都噶爾卒子車零

及達都琥達瑪璘皆早死罕都阿喇布坦與噶勒丹聚牧阿爾台之科布多仍各領部眾阿喇布坦妻曰扎爾爲喀爾喀右翼扎薩克圖汗成袞女成袞子沙喇與左翼土謝圖汗察琿多爾濟以爭屬產不相能噶勒丹誘沙喇往會阿喇布坦察琿多爾濟率兵戕之復侵殺噶勒丹弟多爾濟扎卜噶勒丹因與喀爾喀構兵二十年罕都阿喇布坦從噶勒丹侵喀爾喀由杭愛山陰至額爾德尼昭敗土謝圖汗兵以喀爾喀內附乃還二十九年噶勒丹復由烏達罕嶺侵喀爾喀罕都阿喇布坦自茂岱喀喇色古爾山陰以兵會有策妄阿喇布坦丹津鄂木布者皆噶勒丹兄僧格子也策妄阿喇布坦怨噶勒丹徙博囉塔拉丹津鄂木布仍附噶勒丹牧

阿喇布坦善丹津鄂木布與策妄阿喇布坦交惡策妄阿喇布坦
偵噶勒丹侵喀爾喀潛兵至科布多掠噶勒丹妻阿努及牲畜去
噶勒丹爲大軍所敗挈罕都阿喇布坦等遁歸罕都陰語阿喇布
坦曰我等當入告

天朝及達賴喇嘛令噶勒丹與策妄阿喇布坦息爭否則善自爲
計分處可也阿喇布坦以其謀告噶勒丹罕都懼奔策妄阿喇布
坦所阿喇布坦畱事噶勒丹尋異志噶勒丹游牧孔圭濟達琿所
部屯耕鄂爾坤阿喇布坦游牧察罕色琿所部屯耕扎布堪哈薩
克圖旣而噶勒丹循克嚕倫河徙牧巴顏烏蘭強阿喇布坦往會

三十五年

上親征噶勒丹

駐蹕什巴爾台

遣諭噶勒丹曰汝當親至與朕定議否則以阿喇布坦等爲使時
噶勒丹屯兵克嚕倫之克勒和碩聞

駕至懼夜遣人赴巴顏烏蘭召阿喇布坦與議我大將軍費揚古
自西路迎擊兵偪礮聲不絕所部蒼黃走阿喇布坦禁之不可馳
語噶勒丹曰

天朝兵威誰不知之是不可與戰噶勒丹益失所恃與俱遁至特
勒爾濟口遇西路軍敗竄阿喇布坦集殘眾赴博囉河偵噶勒丹
匿塔密爾之台庫勒復往就會丹津鄂木布以爭牧與噶勒丹隙

違之約阿喇布坦偕行阿喇布坦亦棄噶勒丹去由吉齊根特轉徙扎布堪之濟思布隆珠爾庫珠等處與噶勒丹相避行噶勒丹復自伯格爾察罕額爾克遣宰桑車凌布木召之阿喇布坦不往徙牧布顏圖杲爾其屬羅卜藏班珠爾者以來歸久請說降

允之復以喀爾喀親王策旺扎布郡王衮布固魯什喜皆阿喇布坦姻戚

詔遣屬往招之降時阿喇布坦及丹津鄂木布謀就策妄阿喇布坦以前憾不果往

敕曰朕統大軍敗噶勒丹兵丹巴哈什哈沙克珠木等接踵歸誠俱已授爵秩給衣食今朕復親統六師調各路兵勦噶勒丹儻不

來降必窮之於其所往爾阿喇布坦及丹津鄂木布前雖附噶勒
丹然非倡亂之人今來降者皆云爾等與噶勒丹分析各居朕嘉
爾猶知天道能自振拔憫爾牲畜被俘衣食已絕特遣使往諭其
扎薩克圖汗之子策旺扎布先經離散朕已收歸封親王爵覓爾
妻母令與完聚頻加撫恤頃又擇地賜牧使安生業爾其知之敕
至爾卽率眾來歸前附噶勒丹罪朕不之究必待爾以富貴顯榮
爾之部眾亦令妻孥完聚各得生業爾若尙有疑懼前策妄阿喇
布坦使至時請朕勿討爾罪令往與會朕以策妄阿喇布坦遣使
納貢敬慎有加深加憐惜爾若往附策妄阿喇布坦朕不究詰儻
不擇斯二者傲倖於額克阿喇勒洪郭爾齊斯希等峻險之處棲

身苟免朕必往討爾其早作良圖毋或自貽伊戚追悔於將來也
三十六年使至授之

敕阿喇布坦及其妻告願遵

旨內徙以噶勒丹介居請徙近策妄阿喇布坦牧時丹津鄂木布
居吹地遣屬往告各使齎奏至不卽降復

敕其使諭之會噶勒丹自哈薩克圖哈喇阿濟爾罕遣使土克齊
色稜達什召阿喇布坦不赴且奪召者騎自布顏圖杲爾徙阿爾
臺之喀喇額爾齊思呼里木圖等處噶勒丹欲踰阿爾臺至額克
阿喇勒捕魚食慮阿喇布坦襲已不果尋自殺丹津鄂木布奔策
妄阿喇布坦所阿喇布坦仍分牧游行遣使奏請入貢

諭曰朕前聞爾與噶勒丹異處遣使諭爾來降或往依策妄阿喇布坦聽爾自爲計但不得據險竄伏爾無所歸爾遣使諾顏格隆藏布額爾克鄂木布阿旺達什等奏稱噶勒丹若至近地必擒執之以歸聖主朕又令爾使齎敕往諭雖不能擒殺噶勒丹但束身來降亦必富貴優養毋疑毋阻今爾稱蒙諭來降卽欲親往入奏偕策妄阿喇布坦同牧因臣妻疾甚是以不果往不論所居何地自當請安進貢以此觀之爾無乞降誠意尙爲首鼠兩端計目今情事爾所灼知丹濟拉車凌等來降朕悉加寵眷策妄阿喇布坦擒伊拉古克三呼圖克圖授朕使令治罪爾欲他往勿復望加爾厚恩顯榮事今憐爾無歸迫於生計欲使得所爾其熟籌之毋貽

悔阿喇布坦復不卽降竄齋爾納木初罕都棄噶勒丹往就策妄
阿喇布坦達都琥子達爾扎從之策妄阿喇布坦奪其屬禁罕都
及達爾扎噶勒丹滅始釋之罕都攜戶百餘乘間脫將爲內附計
至齋爾納木懼爲阿喇布坦畱棄其屬挈孥大雪中間道赴巴里
坤三子皆走死僅以妻女及從者七人行哈密郭帕伯克擒之詰
得狀遣使導至三十七年入

覲

諭曰爾來歸情殊可憫所挈屬眾雖少以爾父嘗納貢故仍授台
吉職先是阿喇布坦屬降者

詔安置察哈爾牧曰四品官噶羅卜藏曰二等侍衛瑪穆曰三等

侍衛達克巴藏布及壯丁百七十餘設佐領一隸鑲黃旗以噶羅卜藏領之至是

詔罕都與同牧後授三品散秩大臣子二長索諾木如罕都職次阿喇布珠爾授三等侍衛四十一年阿喇布坦來歸丹津鄂木布既奔依策妄阿喇布坦尋爲所禁阿喇布坦懼不赴策妄阿喇布坦掠其牧乃徙額訥倫杲爾集諸宰桑言曰我今決內向矣遣使諾顏格隆藏布齎奏至

詔允降阿喇布坦挈屬徙策妄阿喇布坦遣族台吉大策凌敦多卜羅卜藏琳沁等以兵二千追之阿喇布坦列兵禦其宰桑洪科爾額爾奇木子車克擊斬羅卜藏琳沁及兵四百餘會我使往迎

大策凌敦多卜等遁阿喇布坦率戶七百餘屯茂岱察罕廋爾遣
洪科爾額爾奇木馳奏

賜御用冠服未幾入

覲京師

召見保和殿

諭曰厄魯特歸降來朝未有率人如爾之眾者爾既傾心來歸甚
屬可嘉朕所用避風石數珠最利風疾以賜爾阿喇布坦奏臣產
絕域無知昔犯

天朝每思及心膽俱裂

諭曰爾厄魯特爲人多疑朕親率師至克嚕倫遣使諭噶勒丹來

降彼不之從故至交戰失利其時若卽歸款朕亦卽已前厄魯特
來降者朕皆授大臣職爾等尙不之信今已優養數年各安生全
雖未從征立功扈從巡哨亦常盡力今觀爾體貌健壯他日得力
可知念爾遠涉勞乏且善自調攝暇日可更與爾語也

詔封多羅郡王

賜貂裘鞍馬銀幣其從者諾顏格隆藏布洪科爾額爾奇木皆

賜達爾漢號尋

諭游牧推河阿喇布坦將行奏曰臣爲策妄阿喇布坦所掠無衣
食窮困已極蒙

賜糧畜得更生今來入

國朝書牘類稿卷之六
觀又蒙

恩給食乘傳遣侍衛挈駝馬迎臣甫至輒

賜宴復賞

御用珍服及未經見物

天高地厚之恩此生誠不能報但期臣身及臣子孫世世捐軀效力而已至臣屬眾志尙未甯俟數年後再請給賜官職編設旗隊允之四十二年

詔授扎薩克尋卒子二長車凌旺布次色布騰旺布相繼襲

一次襲車凌旺布阿喇布坦長子尙郡主授多羅額駙康熙四十

二年襲扎薩克多羅郡王先是達瑪璘妻布尼塔爾從兄額璘沁

哈什哈至乞降

詔優養之子茂海及車凌從阿喇布坦來歸

詔封茂海爲輔國公五十四年準噶爾襲哈密

諭車凌旺布及茂海以兵備之六十一年車凌旺布來朝雍正元年

諭曰厄魯特公茂海從阿喇布坦來時

皇考深加愛養今在軍前輸誠效力有年著晉封固山貝子三年

車凌旺布及弟貝勒色布騰旺布來朝四年理藩院奏游牧推河

諸厄魯特請各設旗分佐領會準噶爾台吉噶勒丹策凌乞和

詔遣散秩大臣伯四格等往勘阿爾台界卽赴推河議編厄魯特